

Mikilsverð

bókmentasýning

Guðmundur Davíðsson á Hraunum, kunnur gáfumaður, bróðir fræðimannsins Ólafs heitins Davíðssonar, hefir gefið út bók sem óhætt er að kalla stórmerkilega. Það má jafnvel kveða svo ríkt að orði að þessi litla bók sje, að svo stöddu, einstæð í bókmentum jarðar vorrar. Guðmundur Davíðsson hefir um allmörg ár ritað ósjálfrátt, og ritast hafa lýsingar á lífinu eftir dauðann. Að vísu kemur mjög víða fram í lýsingum framliðinna á lífinu „hinu megin“, að það er í raun rjettri, líkamlegt líf á öðrum jörðum, sannarlegt framhald af lífinu hjer á jörðu. En þó hefir það hvergi verið beinlínis sagt, og menn hafa ekki skilið þetta, sem er þó svo afarþýðingarmikið að vita. En í því sem ritast hefir hjá Guðmundi hefir tekist að fá þetta sagt berum orðum. Er óhætt að segja að hverjum hugsandi manni mun finnast mikið um þessar lýsingar, og ekki ólík

legt að þeir verði margir sem fýsir að lesa bókina. — Einn af sambandsvinum Guðmundar skrifar: „Jeg er að undirbúa mig til þess að verða garðyrkju maður“. Minnir þetta á að framliðinn segir við enska prestinn D. Thomas, að garðyrkja sje mjög mikilsmetið starf hjá þeim barna hinu megin. En þó skildi síra Thomas ekki, að verið var að segja frá lífi á annari jörð, og jafnvel ekki þó að framliðinn sem hann hefir samband við, komist einu sinni svo langt að hann segir „our planet“, (vor jörð) (D. Thomas: Life Beyond Death etc., '28, s.169). Áhuginn á þessum efnum mun verða mikill, þegar menn fara að skilja hvað það þýðir fyrir þá sjálfa að vita hið rjetta, og lýsingar á lífinu eftir dauðann, munu verða mjög mikill og merkilegur þáttur í bókmentum framtíðarinnar. — Jeg býst við að rita seinna nánar um þessa merkilegu bók og það framhald sem jeg vona að verði. Þessar línur eru aðeins ætlaðar til að vekja athygli á útkomu bókarinnar.

30. nóv.

Helgi Pjeturss.

Net Ida 1929